

雞林尹有惠政流亡復業召拜政堂文學甲寅春知貢舉恭愍
薨居閑十六年壬申門生趙浚當國薦為檢校門下侍中光陽
府院君卒年八十 上輟朝謚文簡子稔安國○庚申以天變
地恠設法席于臺山上元金剛山表訓等寺○壬戌行三聖齋
于釋王寺○癸亥金木相犯○甲子暴雨震電○左政丞趙浚
為 上設請 命醮禮於昭格殿○乙丑赤氣自東橫流城市
○丙寅雷電雨雹虹見坤方火犯軒轅左角○時 上王欲為
上設醮請 命致齋于昭格殿○戊辰流星出元入南斗○
己巳奉化伯鄭道傳宜城君南閭及富城君沈孝生等謀害諸
王子不克伏誅初 上以 靖安君開國之功諸子無與為比
特 賜世傳東北面加別赤五百餘戶其後以諸王子及功臣
為各道節制使分管侍衛兵馬 靖安君全羅道撫安君芳蕃
東北面於是 靖安君以加別赤讓芳蕃芳蕃受而不辭 上
知之亦不責還也道傳閭等謀欲擅權貪立幼孽謂孝生孤寒
易制譽其女有婦德請為世子芳碩嬪與世子母兄芳蕃姊夫